



Nakmikistem Aapqughwaalqumsiighi

Kestistet iglehutistengit Amarakami elngaataall qafsinaghqengngaaq state-et allakaqaghtaghmeng liilighuusalighuulluteng iglehutkayugukangit nakmikillghem iglehutellghi. Kavemem liilighuusaan qafsinggaat maligsaghqaghhaat state-enun maligutusaghqameng. Enkaangam, itagnalleghpigaat ilatellghemllu nakmikillghemllu liisaghqiit naalkelleqasi negpesi kestivigan qepghaghvigani.

Takugu eac.gov/vote takuyaghqaneng state-egpek nalighmeng nalighneghpek kestivigan website-anganun amallega naalkesqelluku negpek kestivigan qepghaghviga.

Ilangi Nakmikillghem Aapqughwaalqumsiighi:

- [National Association of State Election Directors \(NASED\)](#)
- [National Association of Secretaries of State \(NASS\)](#)

Naten Kestillghem igleghallgha

Kitum iglehutaqagu kestilleq state-emni?

Allakaqaghtaghmeng state-et kestisteneng umiilelguut qepghaghteneng, esghaamakaqaa nalighmeng kayutngwaaquq state-emllu kavememllu nakmikillghitneng. Qunereng, nakmikillghet kiyang iglehutaqiit county-mi, iwernga ilangitni states-eni city-t sangwaat iglehutaqiit nakmikillghet. States-et iglehutaqiit nakmikillghet allakuteperuwaagh luteng, ataasini state-eni allakanighaqluteng ayuqut. Kestillghet igleghusaghngaaghmeng ataasim yugem nalighmeng qafsin'guluteng, iglehutistet nalighmeng kayutangita kestillghet, nalighmeng qafsin'ginaluteng.

Kestistet iglehutistengit Amarakami elngaataall qafsinaghqengngaaq. U.S.-mi 10,000 siipngaghmeng ayuqut nakmikillghem nalighneghi. Alngunagiinaagut angtaIngi, mekestaanghi nem qafsin'ggaghmeng hundred-et ilatkat namikistet enkaam angenghi nalighneghem maani 5 million siipngaghmeng. Nem kestistengan qepghaghtengi ama aklukaqiit liitngwaaqat nakmikivigem qeghpaghtet (kiyang bipartisan-et) kayusiitaqegkangit nakmikistet nakmikiyaghghemllu Nakmikivigmillu. Naavghututistun ayuqelghiistun piluki, KEK-m

kelguvikaqiitlu iglehghutilleghmengllu kayusiisqelluki kestistem qepghaghtengi, taawanginaq KEK-m atanghusigatii kestillghet.

Liitaghaghnaluku kitum iglehghutaqegkangi kestillghet state-egpeni takugu eac.gov/vote.

Nakmikivigem qepghaghtengi sakayugaat? Naten kayusighinayaghsinga?

Nakmikivigem qepghaghtengi megnunaghtut iglehghutilleghitneng kestillghem. Nakmikivigem qepghaghtengita qelpeghtaqiit nakmikiviget unanguluku; nakmikistet iteghtestaqiit enkaam nakmikusineng tuunaqiit; nakmikistet kayusighaqiit; iglehghutaqiit kestillghem liilighuusiitlu maligsaghqiitlu; esghamakaqiit nakmikusit tunqullghit, nakmikusitlu saghyatlu; uumgaqiit nakmikiviget; kestaqiit nakikistet iitqat qaywa elqughaghutangi nakmikusit kesutngukat.

Nakmikivigem qepghaghtengi kiyang nem kestistengita qepghaghtengit apeghtughaqiit enkaam qerngaghghmeng qepghataqt (kiyang bipartisan-et). Nakmikivigem qepghaghtengi akeqiit maligsaghqaluki kestillghem liilighuusii ama kestillghem kelengasaghaallu.

Tuqlughqi negpek kestillghem qepghaghtengi helpamericavote.gov -mi liitaghaghnaluku naten ilannaluten qepghaghtenguluten nakmikivigmi state-egpeni.

Kitum esghapagnayaghtagu nakmikilleq?

Kestillghem esghapagtengi ilanganikun atiighaqegkangit “nakmikivigem esghapagtengi,” qaagkuminguat esghapagyaghngaaghmegteki namikillghem iglehghnegha. State-et allakaqaghtaghteng liilighuusialguutlu maligsaghanengllu naten kinkut esghapalleghqiitneng nakmikilleghneng iwernga kiyang, nakmikillghem esghapagtengi sanguyaghngaaghmeng saam qepghaghtengi, katam political-em party-ngan nalighmeng partisan-engunghilnguut qernguneng, nakmikisaghqam kayagtii, akemken ilanganeng esghapagtet, nakmikivigneng aanaqelghiineng qernguneng, nalighmeng kavemem nalighmeng state-em qepghaghtengi.

Igleghnegha nakmikillghem esghapagtem whatetug esghapagaqiitlu kelengakaqiit nakmikillghet, sangwaat sastengngunaki nalighmeng qinuyugtiillngunateng. Liilighuusii nakmikivigem esghapagtengi allakutut state-ekun. Tuqlughqi negpek kestillghem qepghaghtengita liitaghaghnaluku pilleghqaanengllu salqumsuganengllu nakmikivigem esghapagtenganeng nunagpeni. Naalkataghaghhu nakikillghem esghapallghaneng state-egpeni whani eac.gov/vote.

Nani naalkeseqsingi nakikillghem apeghiillghi?

Apeghiighyuuhaallghet nem pillghita aapghaqiit state-em nakmikillghem qepghaghtengitnun nakmikiviget umellghita kingununganeng Nakmikivigmi. Ipapighqengngwaallghilnguut apeghiillghet kelgutaqiit state-em kestivigan website-angani enkaam aapghaqiit ungipaghtenun Taakut apeghiighyuuhaallghet allangughtaqaaghtut Nakmikillghem kingunangi nakmikillghem qepghaghtengita aapghumanginaghaqegkangit nakmikusighlluwahaaghet, ilalluteng nakmikusit allangughtekayuget sangwaat, aviillutengllu tuyuqagugetlu nakmikusit, ama nakmikusit kesutnguyaghqat yarmitlu akmanlenguut nakmikistet. Inguuniita kesimakatki, ataasiightekata,

enkaam ipapighqegkata atiighaqegkangit canvass-meng, apeghiiqapiget kelgutaqiitlu aapghaqiit, qafsinakaghtekayuget aghneghni tawallu qafsinat weeks-et.

Takugu eac.gov/vote kenegsaghqanun state-egpeni nalignmeng nalignneghmi nakmikillghem website-angani ungiipaghqameng state-em nakmikillghan apeghiillghi.

Sangameng kestillghem apeghiillghi allangughtekayugwaat nakmikillghem ighivgaani? Qakun ataasiightaqat?

Kestillghem qepghaghtengita kesnaqutkaqiit nakmikusit nakmikillghem ighivgaani, taawanginaq nakmikillghem ighivgaan apeghiillghi ipapighqengngwaallghiInguugut ama kingulighpigaanghitut. State-et allakaghmeng maligsaghqalwaaqut tuyuqayugteggun, allangughtekayugetlu yarmitlu ama akmanlenguut nakmikusiit kestelleghqiit. Katamqun ilangita states-et tuyuqayuget nakmikusit kaasaghqaagut Nakmikusim aghneghani. Ilangita kesutngustaqiit tuyumakata Nakmikivigem aghneghani enkaam kaasaghqat natumi aghneghmi.

Canvass-a (ama uglalghiini states-eni, yuvghiilleq) apeghiinghan, kestillghem apeghiillghi taqmiighaqiit. Wata liitaghaghyukuvgu kestillghem apeghiillghaneng, canvass-mengllu ipapighqelleghmengllu esghaghhu: <https://www.eac.gov/election-officials/election-results-canvass-and-certification>

Ilangit nakmikillghet kesneqigsaghngaaghmeng ayuqut ipapighqellghem kingunganeng qayughllak nakmikilleq qantaghtulanganeng nalignmeng nakmiksaghqam nalignmeng kinkut sangwaat aaptekatgu. Kesneqigtellghet allanguut yuvghiilleghneng iingunaghiita nakmikillghet namikilleghmi nalignmeng aaftellghi nakmikillghem nakmikilleghmi kesneqigtaqiit, enkaam apeghiilleghpigaat nakmikillghem allangughsaghngaata ayuqut.

Nakmikusim igleghusii katam ayugitaat?

Ayugitellghi nakmikusim igleghusii megnunaghtut ipapighqellghi nakmikillghem. Kestistengita Kayutangita Kelengakistengit (KEK) allgeghutaqaat maligsaghqat nakmikusim igleghneghi (VVSG), igaqaghhaagutlu maligsaghqatlu, ilalluteng ayugitelleghmengllu itagnaghqelleghmengllu maligsaghqat, nakmikusit igleghusiinun piyaghqiit igleghayaghqaaghsaqata. KEK-t ama nakmikilleghmun saviget saaqiit nanghiqunaluki nakmikusim igleghusii ukunun maligsaghqanun. Ilatelleq KEK-m nanghiqullghanunllu ipapighqengnganunllu ellmeggneng piyukelqaat, iwernga qamagtevzighluteng states-et KEK-m nanghiqullghillu ipapighqellghillu atuqaqiit. States-etlu ama wata maligsaghqalguyukumeng nakmikusit igleghusiitnun.

lingunita states-etlu nemllu nalignneghita atuqaqiit maligsaghqakuusitlu kayutetlu yakughniighsiisqelluki nakmikillghem igleghallghillu itagnatun nakmikillghem apeghiillghi ugpeqsaghqalukillu. Atuqusiit itagnallghit pillghit maakungwaaqut maghqatusit, uumget, igaqusit, nanghiqullghet nakmikillghem sivunganillu kingunganillu, yuvghiillghet ama whateghllugwaaqlu kamyuterkun kelengasiita salqumsugit. Allakaqaghtaghmeng state-et

nakmikillghet qepghaghtengit umiilelguut kelengakikayuk maakut liilighuusatlu maligsaghqat qaywa maligtaqutangi.

Atuquusiit kelengasaghat nakmikusunun igleghallghitnun:

- Tukfighaqiit nanghiqungwaaqatlu ipapighqegkat nakmusim igleghusii
- Kanaghqughwaghaqiit qamagaghlluki sat maliglluki nem liilighusiinun
- Nanghiqungwaghaqiit itagnaatangi nakmikim sanqutangi nakmikivagilgan
- Igleghutellghi nakmikillghet bipartisan-meng qepghaghteklutengllu esghapagtemengllu
- Nanqigtengngwaaghlluki qafsin'gutangi nakikusit tuunkat uglaghtutangitun nakmikiyaqaneng
- Yuvghiighlluki nakmikusit qaywa nakmikusim sanqutangi kestaqutangi nakmikellghet elqughaghlluki
- Waran maalghum (bipartisan-ngunaqepiglluki) igaghaqiillu esghanqigtaqii nakmikusim tuunellghillu nakmikusimllu sanqutangi ataasineng qepghaghteneng nalighmeng naken tuunliinun
- Igleghutaqii whateghllugaaq ayugitellghem pingi

Nakmikusit iwleng nem nakmikellghem qepghaghtengan nayuqngwii nakmikillghem. Nakmikellghetllu mingllitngwaaghyaghqaagut nakmikillghem kingunganeng enkaam yuvghiighyaghqaluki yuvghiilleghmi nalighmeng kesneqigtelleghmi. Wata ungipaghqaq nakmikillghem ayugitellghaneng takugu: <https://www.eac.gov/voters/election-security>.

Takugu [eac.gov/vote](https://www.eac.gov/vote) kenegsaghqaneng state-egpek nalighmeng nalighneghpek nakmikillghan website-anganun ungipaanun ayugitellghanun state-egpek.

Ugpeqnayayagsikun apeghiillgha nakmikillghem?

Uglaghtuq sayaghqaqlu maligsaghqaqlu ugpeqesqelluki apeghiillghitneng nakmikillghet. Nakmillghem qepghaghtengi apeghtughaqiit ama pillepiglleghiit apeghtullghet nakmikillghem igleghutellghaneng. Qamagaghtevzighlluku nakmikillghem igleghutellgha waran maalghuk apeghtughwaaqak qepghaghtek akeqikak maligtengngwaaghyaghqaluki ingunaghhiiita nakmikillghem liilighuusiillu kelengallghallu nakmikillghem. Nakmikillghem esghapagtengi, ilangakun atighaqegkangit "nakmikivigem esghapagtengi," tawansaghngaaghmeng esghamaksaghqaluku nalighmeng esghapakinaghnaluku nakmikilleq.

Nakmikusit ullghitat amalka, ilalluteng nakmikusim yuvghiillghit nanghiqwaaqiit ama ipapighqaqiit [naliit elqughaghutngallegghmun maligsaghqat](#). Uglalghiit states-et saneng elqughaghutngallegghmun nanghiqullghet nakmikusunun nakmikivagilgata. Saamalla amalleqa

nakmikillghem sivungani, uglagluteng states-et yuvghiighyaghqaqiit kingungitneng nakmikillghem. Yuvghiileghmi nakmikillghem qepghaghtengit yuvghiighaqaqiit igat nakmikusit ipapighqennaluki elqughaghutngallghi ullghitam amalka kestillgha. Yuvghiillghet kelgutaqaqiit namikusit kesutkaatangi nakmikistet piyukellghistun ama apeghiillghi nakmikillghem ipangutangi. Wata ungipaq yuvghiilleghneng naalkennaghan KEK-m ungpaani [Nakmikillghem Yuvghiillghi Amarakami](#).

Takugu eac.gov/vote ken'gaghsaghqameng state-egpeni nalighmeng nalighneghpenk nakmikillghan website-angani ungipaghqameng esghaghnaluku naten nakmikusit kestaqtangi state-egpeni.

Naten nakmikillghem qepghaghtengita negughaqatki kinkut nakmikilleghqitneng maalghugneng?

Naliit iglehneghat itemngallghem whatetuq tamaghmeng ataasiinaghmeng nakmikiyaghqaguq. Nakmikillghem qepghaghtengi elngatall qepghaghaqut qaywa ataasiinaghmeng nakmikikatangi nakmikilleghmi, nalighmeng nakmikista nakmikikatanga qafsinaneng (katam nakmikikan tuyuqayugkun enkaam nakmikinaqutkegkan gginasaghluku Nakmikilleghmi), ataasighhinaq nakmikusiq kesutngatanga. Una pinaluku, nakmikistem qepghaghtengi esghamakaqaqiit whaa atut ama elqughatngalghiit nakmikisteneng, uglagluteng states-et yuvghiighutaqaqiit ilatellghemllu nakmikillghemllu igiitneng ilangitnun states-enun. Nakmikillghem qepghaghtengit igat aflengakaqaqiit nakmikistet nakmikusingutkatangitneng, enkaam naakut nakmikusit tuutkatangi.

Nakmikistem piyaghqatanga peqiggneghilkan (katam nakmikista igiitninneghilkan nakmikiyaghqaatni, nakmikistem ungipaa apeghiillghisimakan nalighmeng anagngakan, nalighmeng nakmikista nakmikusingumakan tuyughluku enkaam nakmikesimakan), nakmikesaghngaaghmi allangughtekayugkun nalighmeng sayaghqaghhaanghilngughqun nakmikusikun. Allangughtekayuget nakmikusit allakaghmeng ilangitneng nakmikusineng ayuqut enkaam iglehughaghqagutlu kesutngusaghqagut nakmikistem qepghaghtengan peqigsimakagu nakmikista piyaghqatanga enkaam nakmikillghitutanga nakmikilleghmi.

Nakmikista aaputkuni tuyuqayugmeng nakmikusimeng, nakmikillghem qepghaghtengi peqigtaqaqiit aaputellgha qaywa nakmikistem pikatanga nakmikusilitfagilgan. Nakmikusiq uutghusimakan nakmikillghem qepghaghviganun, qepghaghtet (kiyang bipartisan-et qerngut) peqigtaqaat sign-ellgha nalighmeng ilanga esghaasiit ungipaq nakmikusim qantani qaywa nakmikistem pikatanga. Ungipaq aklukegaq aviitkan nalighmeng taqmiilghisimakan, nalighmeng sign-eyaghqaatanga allangukuni esghaquiitni, nakmikusiq kesutkennaanghituq. Ilanganikun, nakmikista ungipilleqaat enkaam elqughsaghalilleqaat afkuyaq.

Takugu eac.gov/vote kenegsaghqanun state-egpenun nalighmeng nalighneghpek nakmikillghan website-anganun ungipaghqameng naten nakmikusit kelengakaqutangillu kesutngutangillu state-egpeni.

Nakmikimun Ilatelleq

Naten ilalleqsinga nakmikimun?

Tamaghhiitni states-eni iwerngaqun North Dakota-mi, ilasaghqaguten nakmikimun kesutngusqelluten. Ilatelleghqaa allakutut state-kaghtaan, iwernga ilannaluten nakmikimun whatesaghqaguten:

- Amarakaghmii
- Waran 18 uksughtutka Nakmikilleghmi
- Tamakughmiilleghmeng maligusaghqaguten

Ilaasaghngaaghpek gginasaghlluku, tuyughluku, enkaam uglalghiini states-eni uunlaaynekun. Siingenllu ilatellghisimakuvek nalignmeng nutagsaghqakuvgu ilatellghen, wataghlak state-egpek tuunvigani apegghiighnaken. Ilangita states-em nakmikistet ilatestaqiit Nakmikivigem aghneghani, enkaam ilangita states-em tuunvilguut 30 aghneq sivungani nakmikillghem.

Ilangita states-em 18 uksughtukefagilgata ilatesaghaghaqiit nakmikillegmun, enkaam nakmikiyaghngaaghmeng piyaghqaaghtekata.

Takugu [eac.gov/vote](https://www.eac.gov/vote) ken'gagsaghqanun state-egpek nalignmeng nalignneghpek nakmikillghan website-anganun liitaghaghnaluku ungiipaa ilatellghem piyaghqaneng.

Downluughyaghngaaghpegullu ama igangllaasaghngaaghpegu National-em Tuyuqayuk Nakmikistem Ilatellghan Iгаа. Una igaq atuqsaghngaaghmi ilatelleghqaa nakmikistem tamaghhiitni iwerngaqun North Dakota-mi, New Hampshire-llu Wyoming-millu, enkaam piivngaaq 21-eni uluni. Tuguyukuvgu una igaq, whavek pi:

<https://www.eac.gov/voters/national-mail-voter-registration-form>

Naten simighnayagsikun political-ema party-ngan ilatellgha?

Political-em party-gpek pinga simighnaqelleghqaa katam ilalghiistun ayuquq nakmikimun.

Ilangitni states-eni ilatestaqaten party-nun ilanneghpek, enkaam ilangita kelengnaqigataat sangutanga party-n. State-egpek iiskugtengngukagu party-gpek nangaghnegha, aapleqaten nakmikistmun ilatellghanun igani sangutanga political-em party-gpek nangaghnegha.

Ilangita states-em nakmikistet ilatesaghqaqiit party-nun nangaghneghitnun nakmikiyaghqakata nakmikiyaghghni. Nakmikilleghpigaghni (kiyang Aquumughmetaqelghiit), nakmikiyaghngaaghpek alngunak nakmikisaghqaneng, sanguyaghngaan party-gpek nangaghnegha.

Tagugu [eac.gov/vote](https://www.eac.gov/vote) ken'gagsaghaqeng state-egpenun nalignmeng nalignneghpek nakmikillghan website-anganun liitaghaghnaluten.

Naten Nutaghllagsikun nakmikistema ungipaa (aatqa, address-ka, political-em party-nga, ilangillu)?

Nutaghtellgha nakmikistegpek ilatellgha kiyang tawatetut ilatelleghpetun nakmikimun.

Nutaghtigu nakmikistem ilatellghan ungipaa maanakuvek:

- Nuugtekuvek
- Aatghen simiquvgu
- Allanguhsukuvgu political-em party-ngan nangaghnegha
- Nakmikillghisimakuvek estamani uksuni agani

Takugu eac.gov/vote ken'gagsaghqameng state-egpenun nalighmeng nalighneghita nakmikivigem website-anganun naalkennaluki naten sallegghqaghsi ilannaluten nakmikimun. Talwa tuuniyukuvek igameng [National-em Tuyuqayugkun Nakmikistem Ilatellghanun igamun](#) negpek nem nakmikivigem qepghaghviganun. Una igaq atuqsaghngaaghmi ilannegigtemmun nakmikimun tamaghhitnun state-enu iwerngaun North Dakota-nkut, New Hampshrie-enkutlu, Wyoming-emillu, enkaam piivngaaq 21-eni uluni.

Naten esghaghayagsikun nakmikistema ilatellghan ungipaa?

State-et allakaqaghtaghtameng nakmikimun liilighuusalguut, ilalluni naten qaywa ilasimaten. Kiyang esghaghayaghan online-ekun nalighmeng tuqlughluki negpek nakmikivigan qepghaghviga. Ilatngwaaghngakuvek nakmikimun, megnunaghtuq esghalleghqaa qaywa ilatelleghpek ingupaa whaa atuungutangallu elqughaghngatangallu, wata nuuggneghakuvek nalighmeng aatghen simimakuvgu. Takugu eac.gov/vote ken'gagsaghaqmun state-egpeni nalighmeng nalighneghpek nakmikivigan website-anga wata ungipataghalghii kiyaghfigpeni.

Naten uutghunnayagsikun nakmikimun ilatelqa?

State-etlu nemllu nalighneghi sayaghqaghtuuq allakaghtameng nakmikistenun uutghusulghiinun ilatelleghmeggnun. Ilatngakuvek nakmikimun enkaam uutghusukuvgu nalighmeng iiksukuvgu nakmikimun ilatellghen, negpek nakmikillghan qepghaghvigan kayusiinnayaghaaten. Takugu eac.gov/vote ken'gagsaghqameng state-egpek nalighmeng nalighneghpek nakmikillghan website-anganun tawani naalkunnayuaghtuten naantulangi nakmikim qepghaghvigi.

Naten apeghvikughayagsinga ilatkameng nakmikistemeng kiyaghhnanilghimeng address-emni nalighmeng nakmikista ilatkaq tuqukaq?

Latangegkuvek kitumun kiyaghhnanilghimeng address-egpeni nalighmeng tuqukamun, tuqlughnaken negpek nakmikillghan qepghaghviga ungipinnaluki.

Esghamakellghi nutaghsimanginallghi nakmikistem ilatellghi megnunaghtut nakmikillghem igleghutistengitnun. Iingunita states-et nakmikistet ilatellghita salqumsugit whaa maaten atungunaqutkaqit, iwernga ilangakun qepghaghviget nallukaqit kina nuugsimatangi nalignmeng tuqumatangi. Takugu eac.gov/vote ken'gaghsaghqameng state-egpek nalignmeng nalignneghpek nakmikillghan website-anganun tawani naalkunnayuaghtuten naantulangi nakmikim qepghaghvigi.

Nakmikilleghqat

Naten nakmikinayaghsinga gginasaghluku Nakmikivigmi?

Tamaghhita states-et pilleghqalguut gginasaghluku nakmikistet pilinnaluki nakmikusiteng Nakmikivigmi. Ilangitni states-eni navek samun piyaghqagut Nakmikivigmi pinaluteng, enkaam ilangi nakmikivilguut naken alngunak pinguyaghngaaghmeng nakmikinaluteng.

Takugu eac.gov/vote ken'gaghsaghqameng state-egpek nalignmeng nalignneghpek nakmikillghan website-anganun tawani naalkunnayuaghtuten naantulangi nakmikivigkaghten, awangi, ama sangwaa kelqesaghqanayukan (katam ID-t) nakmikiyamun.

Naten nakmikiyaghghnayaghsinga?

State-a ugliinaq namikistaqit gginasaghluku Nakmikivigttestengngunaan. Ilangitni states-eni, nakmikiyaghghaghtestaqit nengita nakmikivigem qepghaghvigani, enkaam ilangitni nakmikiyaghghaaghppek nakmikivigmi katam nakmikilghistun Nakmikivigmi. Esghaghyukuvgu state-en gginasaghluku nakmikilleghqaa Nakmikivigttestengngunaan ama nani pilleghqan, takugu eac.gov/vote, kenegtigu state-en nalignmeng nalignneghen enkaam kenegtigu 'Absentee/Mail and/or Early Voting Information.'

Naten nakmikinayaghsinga tuyughluku?

Tamaghhita states-et allakaqaghtaghmeng maligsaghqalguut kinkut nakmikilleghqitneng tuyughluku. Ilangita states-em sangameng pilleghqitneng apegghyaghqagut nakmikilleghqit tuyughluku, ilangita alngunak kina tungsightestaqit tuyuqayugmeng nakmikusimeng, enkaam ilangita tuyughaghtaqit qamaglluki nakmikistet tuyuqayugkun. Ilangi pilleghqat qinuyuguut, aqnightellghet, nalignneghlliqelleq, naten yugtula, igleghalleq kiyaghfikenghitmini Nakmikivigmi, igaghyangukuni nani, nalignmeng yarmingukuni. Tungsiquvek tuyuqayugkun nakmikusimeng, liisimakngwaaghluku tuunilleghqaa nakmikusin kingusaghqangunaan kesutngusqelluku (ama tuyughim tagtalanga).

Allgeghusimakuvek avilluni nalignmeng tuyuqayugmeng nakmikusimeng, atightughwaaghluki maligsaghqii natenllu qakunllu uutghutelleghqaneng.

- Imighluku inunaghhaan aaptekiit aanveluupnganilnguq. Ilangita states-em noteraayesaghqaqiit nalighmeng esghapestesluki sign-ellghi aanveluupet uutghullghiini nakmikusit tuyuqayuget.
- Wataghllak estaampalighluki aanveluupet uutghusaghqat tuyughvagilafki wetkuqun siingenllu llivikngwaaqumakata.
- [USPS-enkut pirqellghitni](#), tuyughhu nakmikusin uteghmun waran week-a sivutghulluku state-em tuunviganeng wataghllak kaasaghqaluki qepghaghvigitnun.
- Natesaghngiita nalighneghpek liilighuusiillu maligsaghqillu, gginasaghlluku tagisaghngaghpeki tuyuqayuk nakmikusin nalighmeng kanaghsaghqanun nalighneghpeni.

Uglalghiit states-et iiskughtestaqiit tuyuqayuget nakmikusiteng online-ekun.

li-i: Nakmikivigem qeghaghtengi aksaqsaghqaghsi kelengakepigtaqaat, nakmikilleghen aksaqnaqepigtaqiit saaghaatalleghmegteggun. Nakmikillghem qepghaghtengi igaqumanginaghaqiit nakmikimaten, iwernga esghaghnaanghitaat naten nakmikimaten.

Naalkataghagnaghan ungipaaneng nakmikilleghmeng tuyughluku state-egpeni, talwa unqipameng tuyuqayugmeng nakmikusimeng piivngakuni state-egpeni whani: eac.gov/vote.

Ukavantalghinun Nakmikilleq tuyughluku

Esghaqaghluuku stateghpek nalighmeng negpek nakmikivigan qepghaghvigani ungipaaneng naten pilleghqameng ukavantalghinun aapellghi, igallghi ama uutghutellgheghqii tuyuqayuk nakmikusin. Wata unqipaghqaa ukavantalghinun igleghneghani nakmikilleq tuyughluku una esghaqaghhu Saleghpigaat: [Kukragniighsagaq Nakmikilleq Tuyughluku](#).

Naten kanaghfiget salngaget qepghaghaqat?

Ilangita states-em nakmikistenun uutghutestaqiit tuyuqayugit/avilluteng nakmikusiit paqnangilngughnun kanaghfignun salngagnun. Kanaghviget salngaget tufighniighsaghaqii tuyuqayugkun qayughllak nakmikistenun uutghutestaqiit nakmikusiteng nakmikillghem qepghahtengitnun, tuyughnangunaan. Aneghreitkennayaghaat nakmikistet taaymepagilnguut uutghutellghitneng nakmikusteng tuyughluku.

Nakmikinaluten kanaghtekayugkun salngagkun:

- Kanaghtigu nakmikusin uutghutusikun aanveluupemun enkaam imighluku unqipaa aklukegkaa aanveluupkun. Ilangita states-em noteraayesqaqiit nalighmeng esghapagluuku sign-ellgha aanveluupkun uutghullghiini nakmikusimeng tuyuqayugkun.

- Uutghutigu nakmikusin kanaghtekyugkun salghakun nunagpeni. (ii-i: Esghaghwaaqaghluuku kanaghfigek salngagek igaghwaaqatangek county-gpenitulanga, city-gpeni, nalighmeng township-egpeni.)
- Kanaghtekayugek salngagek atughnaqngukufkek wataghllak uutghunnaken tuyuqayuk nakmikusin umegttestengngunaki nakmikiviget Nakmikivigmi.

Allakaqaghtaghmeng state-et maligsaghqalguut sayaghqalguut paqnaniighsaghqameng kanaghfigneng salngagneng. Kiyang maghqatusiigut nalighmeng seal-et, igaqusit ama esghamakisteneng. Ilangita states-etlu netlu salngaget kavemem guygunitaqt nalighmeng nani paqnangilngughni nalighneghni. Nakmikistenginaat qepghaghtengit (kiyang bipartisan-et) saghnalaghaqiit nakmikisit kanaghtinghata salngagnun. Liitaghaghnaluki naten nakmikistem qepghaghtengi paqnangiighsillghi salngagneng esghaghhu [apeghtuusag](#) igaqaat KEKet ama Cybersecurity and Infrastructure Agency (CISA)-enkat naten atuqellghit pananiighsaqt salngaget kanaghfiget. Takugu [eac.gov/vote](#), kenegtigu state-en nalighmeng nalighneghpek nakmikillghan website-anganun qaywa kanaghfilgutanga salngagmeng tungegpeni.

Amarakaghmiingunga, taawanginaq ilani akmani kiyaghtaungu. Naten nakmikinayaghsinga?

Yarmitlu akmanlenguut nakmikistet nengllutumaghmeng allaaghlluggagheng sayaghqalguut nakmikimun. Ilangitni nayuutni, kavemem liilightuusaan (1) yarmitlu akmanlenguut nakmikistet ilasaghngaaghmengllu nakmikusingyaghngaaghmeng kaaputkayugkun, ama (2) nakmikusiq tuyughyaghqaguq 45 aghneq sivutghulluku kavemem nakmikillghaneng. Uglalghiit states-et wata paqnaniisghalguut yarminunllu akmanlengununllu nakmikistenun tamaghhiitnun nakmikilleghnun, nakaan kavemem nakmikillghitnun.

State-em liilightuusaan suumghulleqaa pighmiingullghaneng akmanlengughnun nakmikillghitnun state-millu kavememllu nakmikillghitni [Federal Voting Assistance Program-a](#) (FVAP) atightughyaghqalguuq yarminun, nengllugutangitnun ama akmanlengughnunllu nakmikiyulghiinun. Nakmikistet atuqnayaghaat FVAP-m Nakmikim Kayutanan Apeghtuusaa liitaghaghnaluku ungipaa nakmikilleghmeng state-angitni ama naten aaptelleghmengllu uutghutellghanengllu nakmikusiitneng.

Sangaawat pilleghqanka nakmikistengulunga?

State-et allakaqaghtaghmeng liilightuusalguut atanghutaqegkangit naten nakmikillghit igleghutellghit, iwernga qafsinguut kavemem liilightuusii aflengakekaqegkangit nakmikilleghqiitneng Amrakaghmiinun. 1965-em Nakmikilleghqaan Liilightuusaa iinghutaqaa ighlegutillghmengllu ama nalighneghet kayusighistaqiit nakmikimun tamaghhiitnun iwerngaun qafsin'ggaghnun, Kayusighhu Amaraka Nakmikim Liilightuusaan piiqaa (1) nakmikistet aksqeqaghluku ellmeggneng nakmikilleghqaat, (2) allangughsaghngiita nalighmeng

elqughsaghangiita nakmiksiit tuunvagilglatki ama (3) nakmikistet nakmikistaqiit allangugtekayuget nalighmeng afkuyiilngughmeng nakmikusimeng.

Pilleghqaghten Nakmikinguluten

Kavemem nakmikillghan liilighuusaan aflengakaqiit nakmikilleghqaghten ama nakikillghem igleghnegha. Kiyang nakmikistet maananayaghtut:

- Nakmikinayaghtut paninang utaqiingukata nakmikiviget uumkata
- Allaneng nakmikusimeng tungsilleq anagtiimakata
- Allangugtekayugmeng nakmikusimeng tungsilleghqaaq igaaninneghilkata nakmikivigmi
- Tungsilleghmeng ulungitgun kayutmeng nakmikivigem qepghaghtenganeng kayutsukata atightumeng nalighmeng liigikelleghqaa nakmikilleghqameng
- Tetugyullngunaan nalighmeng qinuyugtellngunaan nakmikinguluni

Nakmikilleq Naatlugmelluni

Kavemem liilighuusaan aflengakaqii nakmikistet naatlugmelnguut. Nakmikistet naatlugmelnguut maanayaghngaaghmeng:

- Nakmikilleghqaaq aksaqeqaghllukullu allakaghmillu
- Nakmikivilgulleghqaaq nakmikusilegmeng ukavantalghinun nakmikistenun

Nakmikistet maananayaghtutlu:

- Kayutniighnayaghtuq qepghaghteneng nakmikivigmeggni apeghtuqat atuqayugit nakmikusit piyaqniighsaghqat, nalighmeng
- Kina kelqesaghngaaghmegtegggu kayutkaghqaaq nakmikimun

Nakmikistet aapsaghngaaghmeng unqipameng namikimun kayutmeng, nakmikim kayutanganeng, ama avilluteng nakmikusit maligsaghqat piivngalghiit.

Wata unqipaghqameng takugu eac.gov/vote nalighmeng tuqlughu Amarakam Kestistengita Kayutangita Kelengakistengat tuqulughluki 866-747-1471-mi nalighmeng lataluki listen@eac.gov-mun. Ungipaq Amarakaghmiit Nalighneghmellugmelnguut Liilighuusaan piivngaaq ada.gov-mi.

Ilangi Atightughyaghqam

Itagnalleghpigaq ungipaghqaq state-egpek nakmikistem ilatellghanengllu nakmikimllu liilighuusaanun state-egpek nalignmeng negpek nakmikillghan qepghaghviga. Takugu eac.gov/vote, kenegtigu state-en nalignmeng nalignneghpek nakmikillghan website-anganun.

Wata naalkullequten ungipameng kavemem liilighuusaaneng Civil Pilleghqaan Division-ngan website-anani justice.gov/crt/voting-section.

Iganeng kavemem nakmikillghan pilleghqaaneng liilighuusaanengllu aflengakillghanengllu, ama ilanganengllu nakmikim ungipaaneng takugu usa.gov/voting-llu ama vote.gov.